



# Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 7

Yangia anidakangma :



TAPAK 8

Haiti nung menoknok anak; Nisung pezü süogo

Sorkari sensaksem atema wrestler tem jaokogo: Sports Minister



VOL. XX NO. 236 (ADOK 236) DIMAPUR YANGTEPNÜ (THURSDAY) AAMI (JUNE) 08 2023 ₹ 5.00

## APO aser KVC-i NSF o Naga Club dang mepishir

**Dimapur, June 7, 2023 (TYO):** Angami Public Organisation (APO) aser Kohima Village Council (KVC) külemi Naga Club o Naga Students Federation (NSF) lennirtem dangi temepishiba shidi ka zülüogo. APO aser KVC teloktemi Naga Club aser NSF dang Naga Club ki indang ken o tamajung küma maotsü asoshi onük pezü metetdaksü. Parnoki telok anaprong dang

sangdong magütsüsü aser kati ka anema mejembiteptsü mepishio. APO aser KVC-isa telok ana dang okadak masü saka tiyongtsü nung jembishinüa angateteptsü atema telok ka anioksü temelaba meshio. Parnokisa Naga Club dang kimung nung mapa kecha meinyaktsü aser NSF dang FIR benoka aliba agientsü atema mepishia metetdaksüogo.

## Manipur nung tanur ka den tetsü rongset

**Guwahati, June 7, 2023 (Agencies):** Manipur kübok Imphal West nung Deobarnü Meitei nung telok kati ambulance ka nung arishi küm 8 tanur ka den pa tetsü aser kinunger ka rongset. Iba lendong ya Lamphel police station kübok atalok aser tasürtemji arishi küm 8 tain Tonsing Hangsing, pa tetsü Meena Hangsing aser kinunger Lydia Lourebam nung ta jangjaogo. Tanubosang tekolak nung injang agi yiruba sülen ambulance ka nung anir mozü kidangi aodang iba lendong atalok ta police aser army-i metetdaksüogo. Tanubosang tetsüji Meitei tsür aser tebu ya Kuki nung lir. Parnok ya Kangchup nung Assam Rifles relief camp nung jenoka liasü. Deobar nikongdang iba tesem nung khatap aser relief camp telung nung liaka tanubosang dak

injang agi khashi. Iba tatalokba sülen security akangshio. Assam Rifles ketdangsur kati ashi. Iba lendong atalokli Assam Rifles ketdangsur kati Imphal nung police den jemi aser ambulance ka renem. Tanubosang tetsü ya Meitei tsür asüba agi Regional Institute of Medical Sciences-i anir aotsü lemtet. Kilometer ishika Assam Rifles escort-i ambulance meiner ao aser iba sülen Manipur police-i melenzük. Aonung 6:30 ako meta Isoisemba nung civilian telok kati ambulance anendaksü aser mi senoktsü. Iba mapang driver aser nurse jena ao aser ambulance nung mena alir nisung asemji rongset. Kangchup tesem nung Kuki yimtsüng aika lir aser iba yimtsüng ya Kangpokpi district-i Imphal West district den arrtsü anasa lir. May 27 nungi iba tesem nung khatepyonga arur.

## U.S. Mission in India-i kaketshir aika nem visa agütsür

**New Delhi, June 7, 2023 (Agencies):** U.S. Mission in India-i June 7, 2023 nü India nung kaketshir 3,500 shi kati visa meshiba atema interview agia liasü. Iba mapang New Delhi, Chennai, Hyderabad, Kolkata aser Mumbai nungi Consular Officers aden. Ambassador Eric Garcetti aser India kübok tesem balala nung Consuls General-i United States nung azüngtsü atema visa angurtem nem tenüngsang agütsü. "Ni mezüng India-i arudang kaketshir ka ama aru aser ni item tajangshibatam ajanga taküm nung temelenshi anguba metetogo" ta Ambassador Eric Garcetti-i ashi. "U.S-India tesentaktep nung student exchange ya tongtipangtiba lir. U.S. education ajanga kaketshir nem world-class education agütsür aser shisatsü angutsü atema global network lenmang lapoktsür. Iba jagi tanü onok yangi lir aser India

kaketshirtem akokba tashi ajungmesor" ta paisa ashi. Student Visa Day ajanga United States aser India tsüngda mapang talangka higher education tesentaktep benjunger. Taküm United States nung India nung kaketshir 200,000 tema züngdar aser iba ya US nung tang tezüngdak international students nung 20% tema lir. Yaküm India kaketshir 125,000 nem student visas agütsü aser iba ya otsü tasen ka liasü. Yaküm kaketshir pungu shia nungi ka nem visa agüja liasü. United States nung züngnüba kaketshirtemi EducationUSA den osang tongteptsü ayongzükür ta U.S. Mission-i metetdaksüogo. EducationUSA nung accredited U.S. colleges aser universities dena lir aser India nung advising centers 8 lapoka lir. Kaketshirtemisa educationusa.state.gov mesüra Facebook o Instagram nung @educationUSAIndia semdangtsü akok ta parnokisa ashi.

## Nagaland indang indigenous toys & games handbooks sayaogo

**Kohima, June 7, 2023 (TYO):** State Council of Educational Research & Training (SCERT) Nagaland-i Bodbarnü kaketshir asem sayaogo. Tanü School Education and SCERT Advisor Dr Kekhrielhoulie Yhome-i Indigenous Toys and Games of Nagaland, Nagaland Early Childhood Care & Education (ECCE) curriculum handbook (Theoretical principles & thematic framework (Part-A) aser Nagaland ECCE Curriculum handbook (Theme based learning experiences - Teacher Manual (Part-B) kaketshir sayatsü. "Kaketshir ajaki quality education angutsü atema National Education Policy (NEP) 2020 ya temelenshi bener aruba inyakyim ka lir" ta SCERT director Kevirale-ü Kerhüo-i ashi. "NEP 2020 ajanga arishi küm

8 tashi ECCE indang curricular aser pedagogical framework renemtsü nungdak kümdaksü. Iba nung ajemdaker Nagaland ECCE Curriculum Handbook yangluogo aser iba ajanga state nung lokti aser sobaliba dak sendaka quality preschool education agütsütetsü" ta lai ashi. "Iba kaketshir ya sorkar aser nija subject tesayurtem, SCERT/DIET nungi teacher-educators, School Education Department, Social Welfare, private sector nung ECCE practitioners aser Azim Premji University Bangalore nungi tesayurtem yaritepa iba handbook adoker" ta Kerhüo-isa ashi. "Indigenous Toys and games" ya shisatsü anguba kaketshir ka asütsü kechiyong iba nung Naga nung sobaliba takar bushitepa zülua lir, ta laisa shisem. Naga nung oshi aser

jembishinü ya Sanskrit mesüra Tamil ama tulu masü ta Advisor Yhome-i ashi. "1924 nung mezüngbuba Naga graduate adokba sülen educational system nung temelenshi jenti nguyonga arur saka Naga nung anibelem mesüra timtem kecha magii dang arur" ta paisa ashi. "SCERT-i kaketshir tajungtem adokba atema tenüngsang agütsür aser item kaketshir ya mapang talangka benschia aotsü imlar. SCERT-i tarutsü anogotem maparen inyaka aoba nung akokba tashi yariteptsü" ta Iba sentong nung Commissioner & Secretary Kevileno Angami, Mission Director Samagra Shiksha Nagaland Tamsunaro Aier, Nagaland Board of School Education Chairperson Asano Sekhose aser School Education Director Wonthungo Tsopoe nung aden.

## Nagaland-i Food Safety atema Centre dang teyari meshir

**Kohima, June 7, 2023 (TYO):** Nagaland sorkari Centre dang basic food safety laboratories amenoktsü atema teyari meshio. Tangalen nungi chiyungtsütem bener aruba tendangtsü atema Nagaland sorkari teyari meshir. "Central Advisory Committee, FSSAI, Delhi indang 40 buba National Meeting nung Nagaland sorkari Basic Food Laboratory 5 aser Modified Food Safety on Wheels (MFSW) 5 meshio" ta Commissioner & Secretary, Health & Family Y. Kikheto Sema-i ashi. "Nagaland nung tang Kohima nung food safety lab ka aser MFSW ka dang lir. Asenoki talila amenokra shishilembadak, school, hotels amala nung chiyungtsü tajungba nung tendangtetsü" ta pai ashi.

Food Safety Authority (FSA) Department of Health and Family Welfare, Nagaland-i 5 buba World Food Safety Day sentong ayonga agidang Kikheto Sema-i iba osang metetdaksü. Iba sentong ya Kendriya Vidyalaya, Lerie, Kohima nung ayongzükü agi. "Süoshi aser garitem machir saka item ya air conditioned markets nung ayoker, saka aonsotsü aser chiyungtsütembo yimdong nung ayoker. Anungji aonsotsü aser süoshi ayokba tesem melenteptsü nungdaker" ta Kikheto-i ashi. Küm shia India nung chiyungtsü aser tzü tamajung ajanga nisung million 2 shi asür. Maneni chiyungtsü tamajung ajanga alima nung tashidak balala adokdaksür, ta paisa ashi. "Food safety melira food

security mali aser iba ajanga nisung temang anema alibaren nung kongshir. Nagaland ya adulterated aser sub-standard products indang dustbin masü anungji asenoki tali temeranga inyaksüla aser aseni mozü mamshii tsünütetba chiyungtsütem achitsüla" ta Kikheto-isa aluyimertem ayongzükü jemi. Iba sentong nung State Programme Officer (Food Safety), Dr John Kemp-i anogomung osang lemsatet. Sentong nung Assistant Director (Technical), SPHL, Bendangsenla-i temoatsü meshia sarasadem aser Deputy Director (Food Analyst), SPHL, Khruhutolu Veswuh-i anküp tepela o jemi. FSA Nagaland-isa common food adulteration indang temettetsü sayua liasü.

## Ahmedabad nung Naga lanur 2 züka merenshi

**Dimapur, June 7, 2023 (TYO):** Gujarat kübok Ahmedabad nung Nagaland nungi nisung anati non-vegetarian aser northeastern chiyungtsü ayokba atema nisung telok kati züka merenshi. Iba lendong ya Chanakyapuri nung atalok aser Naga nung Rovimezo Kehie o Mapuyanger Jamir nay a 'One Stop Northeast' ta ser eatery ka nung inyaker. Hindu nung teimba ser aliba Gujarat state ama ka nung non-vegetarian aser northeastern chiyungtsütem ayokba atema nisung 10 telok kati Rovimezo aser Mapuyanger na dak süng agi züka merenshi. Iba tatalokba sülen Rovimezo-i Sola police station nung FIR ka benok. Iba mapang customer kati tena kümzüktsü merang saka pa dak-a teka sangshi. Maneni, nisung telok jagi Rovimezo aser Mapuyanger na dang Ahmedabad nung non-vegetarian asere northeastern chiyungtsü yokra

tepsettsü ta amokmeren. Bodbarnü Nagaland Chief Minister Neiphu Rio aser Minister & BJP Nagaland president Temjen Imna Along nati iba tatalokba aitsüogo. "Northeastern aser non-vegetarian chiyungtsü ayokba atema teka sangshiba osang angashia temulung raksar. Asenoki kati ka sobaliba maittsü aser achiajamba akhümtsübula. Temeyoktep nung telongjem ta asüba tangatetba ama asenoki alitsüla" ta Chief Minister Rio-i metetdaksü. Northeast nung chiyungtsü aser sobaliba atema amakba angudang mepelar, ta Minister Imna Along-ia ashi. School Education & SCERT Advisor Dr Kekhrielhoulie Yhome-ia iba tatalokba aitsü. "India sensotemi chiyungtsü, sobaliba aser lokti nung libaliro angatetsü ano mapang talangka lir" ta pai ashi. "Delhi amala yimti tului ora

asenok dang chinky aser tenükji reprangang tasa ashi. Tangbo item o jembirtem ozüng agi merenshir. Anungji India sensotem tenük lapoktsü ano mapang talangka lir" ta Yhome-i metetdaksü. Nagaland sorkari Gujarat nung bangdak ketdangsurtem den osang agitepdar, ta paisa shisem. Naga Students Federation President K. Tep-ia iba tatalokba aitsüba metetdaksü. "Iba ya Naga nung dang masü saka North East nung ajunga bendanga amshiba inyakyim ka lir. India nung ibala lendong atalokba atema jashir" ta Tep-i ashi. "Iba tatalokba ya Naga nungeri dang masü saka nisung ajaki aser talisa North Eastern state ajaki aitsütsüla. NSF-i Gujarat nung subordinate bodies den osang agitepdar aser temeten angutsü atema inyaksü" ta Tep-isa ashi.

# Longleng nung Phom Day mungogo



71 buba Phom Day sentong nung MLA B. Bangtick Phom tesemdang tongti liasü aser pai Phom Day nisan songa liasü

**Dimapur, Aami/June 07 (TYO):** Longleng nung June 6, 2023 nü "Peace within, Peace Beyond" omen kübok 71 buba Phom Day munga liasü, kong MLA B. Bangtick Phom tesemdang tongti liasü aser pai Phom Day nisan songa liasü.

Phom Day pledge declaration site nung MLA A. Pongshi Phom-i Phome Day monolith semzüksü aser pai nüburtem dang Phom lushie nung mangko bushiba putu tatem kati arudaktsür Phome nung pioneer tem, talisa Asür Hamnyei aser Asür Yongtau nunger bilemtetsü, ayongzüka liasü.

Phom lima nung tesunep aser yimchijung lidaktsütsü mechi Phom nungeri pioneer tem tsüngsü nung jajatsü ayongzüka aser lanurtem dang yimjung aser telungjem asoshi parnoki lenmang yanglua yutsüba bilemtetsü ajungshi.

Deputy Commissioner, Longleng, Dharam Raj, IAS ajanga salem o jembia liasü.

Chongpe Angh, Secretariat Assistant Education Department; C. Henchem Phom, Centre Administrator Sakhi-one-stop Centre Longleng aser T. Lichai Phom nungeri tarutsü nükla indang lemated aser Head Dobashi Longleng-i anir Phom Day tezüngzüktep agia liasü.

Taoba mapang PA to DC inyaka alisang Shudang-i iba sentong nung jembidang, Phom Day ya yimjung anogo khenyongi balaka lir aser küm shia June 6 nü Phom nungeri amunger, ta ashi.

Asür Hamnyei aser Asür Yongtau aser ano yimtsüng balala nungi tashi temeter lenisüba kübok Phom Day ya June 6, 1952 nungi tenzüka mungyonga arur. Iba anogo lenirtemi mangko bushiba aser arür yim amakba anentsü tenangzüktep agi aser Phom lima nung mangko bushiba anena putu tasen ka tenzüka, ta pai ashi.

Iba sentong nung N.I. Jamir

Topper Award aser APGO Academic Excellence Award 2023 item kaketshir nem agüja liasü: (1). Lishen, Manhahu, HSLC top 7th D/o Chingyan, Yongnyah village (2). Imdan Moili Phom, HSLC top 9th, D/o N. Shung-i, Orangkong Village (3). Nokcha C. Phom, HSLC top 16, D/o Chingleu Phom, Hukphang village (4). Mr. Lungshen C. Alley, HSLC top 18, S/o Chizuk Phom, Kangching village (5). Yungken C. Phom, HSLC top 18, D/o Chingsho Phom, Buranamsang village (6). Mr. Themmei Phom, HSLC top 18, S/o Yemchamokholee, Yachem village aser (7). Baunennyuchong HSSLC (Science) top 5, D/o Imlitemsu, Yachem village.

Iba sentong tenzüka Rev. K. Simon, Evangelist, PBCA ajanga sarasadem, Shami Angh, president, PPC ajanga tarur pela agizükba o jembidi aser sentong nung menden Kuplin Phom liasü.

# NVCO ajanga Kohima nung World Food Safety Day amung

**Dimapur, Aami/June 07 (TYO):** Küm shia June 7 nung World Food Safety Day amunger, aser Nagaland Voluntary Consumers' Organisation (NVCO) ajanga Kohima nung ayongzüka munga chiyongtsü nungi lendong timtem ajuruba nung jenbutsü aser kumzüksü, nüburtem temang anema alitsü, rongsenren nung jenjang tajungba kumdaktsütsü nüburtem nem angazükdakja liasü.

Taküm iba anogomung omen "Food standards save lives" omen nung ajemdaker jembidang, shilepba ki ka mali tashi talisa state yimtiba nung asenoki alia achiba shi ya majung lir, ta NVCO tir Kezhokhoto Savi-i ashi.

Market nung aliba aonsotsü aser süngjanglijang ya tajung masü, aser item tebilemtsü koktettsü asoshi asenoki local street vendors tali ajungkettsüla, kechiaser parnoki bener aruba aonsotsü aser süngjanglijang ya

noklang shilem organic lir, ta pai ashi.

Nüburtem, talisa yimtsüng nung alirtemi aonsotsü aser süngjanglijang peria tsünütsüla, aji asünung dang mozü mamshiba chiyongtsü temi market nung anguba chiyongtsü tamajung melentsü aser yimdaklir tema rongsenketzung nung yaritsü, ta Savi-i ashi.

Tanü asen den 'Food Safety & Standard Act' nungja agütsür ozüng ka lir, koba agi nüburtem chiyongtsü tamajung achi-ajemba nungi kumzüksü asoshi chiyongtsü balala tendangba laboratory, mobile van laboratory amala dena lir.

State nung aliba nüburtemi item facility amshia tim masüba mapa inyaka shishilempar mittsüla. Chiyongtsü aika hoptashi lapokba bazar nung jenjang talang yong anguba ya timba majung aser mapang süyir alitsü amai temolung melemer. Anema alibaji rongsen ta asenok ajaki temolung nung teti bilema liti, ta paisa ayongzüka liasü.



Agricultural Technology Management Agency, Chuchuyimlang Block, Mokochung ajanga June 6-7, 2023 anogotem Longkong yimdak Organic Waste Decomposer for Promoting Soil Fertility training agüja liasü. Iba sentong nung shisalen sayur Abenla B Jamir, ATM, ATMA Chuchuyimlang Block aser Aolemla Kichu, BTM, Chuchuyimlang Block liasü. Iba training nung aluyimer 11 aden aser training atemba sülen aluyimer nem metsüjang, Waste Decomposer aser Yellow sticky trap amala lema agüja liasü.



**Income Tax Department**

**Central Board of Direct Taxes**



**'High-Pitched Scrutiny Assessment' nungi saru menoker temi timtem ajuruba atema Local Committee tenteta inyakyimtsü atema totuyuba tasen High-pitched Scrutiny Assessment ajanga tax agütsür timtemba repringshimtsü asoshi Local Committees (LC) tenteta inyakyimtsü atema CDBT-i F.No.225/101/2021-ITA-II, dated 23.04.2022 ajanga revised Instruction agütsüogo. Salient features yamai alitsü:**

- \* LCs nungya Pr.CIT/CIT rank nung züngsem asem alitsüla aser Pr. CCIT (Exemptions) aser Pr. CCIT (International Taxation) densema region ajak nung tentetogo.
- \* Faceless Assessment kübok assessment renemer aliba dak sendakba nung timtemba kar danga lira, e-mail id samadhan, faceless.assessment@incometax.gov.in dangi yoktsüla. Non-faceless assessments atema kasahu Pr. CCIT indang office dangi tsüngtong bener oa agütsütsüla mesüra email ajanga yoktsüla. Metokmeperi arubatem Pr, CCIT indang LC dangi yoktsü aser parnoki iba indang osang agütsütsü.
- \* Metokmeperi osang agizükba ita tatem nungi ita ana tsüngta LC ajanga kanga junga atidanger report ya High-Pitched/Not High-Pitched ama kuli tem dener Pr. CCIT nem agütsütsüla.
- \* Assessing Officer/Assessment Unit ajanga asaa senzüka yutsüba mesüra shisatsü shidak mamshiba, natural justice indang tamendak dak mamshiba mesüra ken o ya high-pitched ta LC ajanga ngutetra, officer anema tapet administrative mera agütsü asoshi Instruction nung shia lir. Revised Instruction dated 23.04.2022 in F.No.225/101/2021-ITA-II terenem ya <https://incometaxindia.gov.in/Lists/Latest%20News/Attachments/518/Instruction-225-101-2021.pdf> nung angutsü.

@Income Tax India

@incometaxindiaofficial

@IncomeTaxIndia

@incometaxindia.official

<https://www.incometaxindia.gov.in/>

<https://www.incometax.gov.in/>




Amenty Welfare and Educational Society ajanga Youth Ministry, Longjang Baptist Arogo den lungjemer World Environmental Day nungtem nung sentong ka ayonga agir tangokba noksa ka angur.

# Mkg. Police-i NSCN(Nikki) telok nung SS Leacy Amento apu

**Mokokchung, Aami/June 7(TYO):** June 6 nü Alichen anasa Mokokchung Police-i gari senzüsempogertem mita repringba mapang Registration number maliba bike ka injang prangpong aser kakat kar bener lia apu.

Police-i apusang ya Zünheboto district Maromi yimer Lhovito jabaso Amento lir. Police pa dang asüngdangyaba mapang nung Amento ya NSCN(Nikki) telok nung SS Leacy inyaker ta jangjaogo. Amento ket nungi Police-i .32 country made pistol den magazine 1, .22 live round cartridge 2 aser iba den ano Sumi Region Leacy Supervisor Writing pad 1, Work Permit of GPRN Ministry of Kilo Affairs 15, GPRN Demand Slip 4 aser



Tax rate indang writing pad 1 ta ngutet. Mokokchung Police-i iba ken o ya MKG.PS-II C/No 0027/2023/U/S 384 IPC R/W 25(1B) Arms Act R/W 7 NSR Act nung benokogota Additional Superintendent of Police Mokokchung-i sangdong ka nung metetdaksüogo.

### Train lendong CBI-i bushisüngdangba anema opposition-i ola adoker

New Delhi, June 07 (Agencies): Tawa Odisha nung train lendong tuluka ataloka nisung 300 jungnüa asüba sülen iba tatalokba bushisüngdangtsü atema Central Bureau of Investigation (CBI) nem mapa nungloktsüba anema opposition party temi ola adoker.

Iba lendong atalokba atema Union railway minister, Ashwini Vaishnav-i minister menden nungi anentsüla, ta opposition party balala nungi lenirtem akhangba mapang nung iba tatalokba bushisüngdangtsü atema CBI nem agütsüba ya BJP-i aniba sorkari lendong atalokba ochi kuli mimshitsü merangba lir, ta opposition-i aitsür.

Taoba hopta Odisha kübok Balasore district nung iba lendong atalokba sülen Railway Minister Vaishnav

lenisüba nung kümzükba maparen inyaka liasü. Iba sülen pai, Railway Board-i iba tatalokba bushisüngdangtsü atema CBI nem agütsütsü benok, ta sangdong.

TMC tongti aser West Bengal chief minister, Mamata Banerjee-ibo, CBI ketdangsertem lendong atalokba tesem tonga marudangyongi kuli balala mimbangogo, ta tai tongloktsüogo.

Mamata-i, "Iba lendong nung CBI kechi inyaker. Train lendong bushisüngdangtsü melen parnok municipalities aser urban development areas-i ang aoer. Iba lendong ataloktsüsa aibelenertem nem temerenshi agütsütsüla," ta ashi.

Congress Tir, Mallikarjun Kharge-i shidi ka ajanga Ato kilonser Narendra Modi dangi, CBI ya railway lendong

bushisüngdangba agency ka masü saka ozüng alema inyakba mapatem bushisüngdangba agency ka lir, ta metetdaksü.

Congress general secretary, Jairam Ramesh-i, "Commissioner of Railway Safety-i Balasore nung train lendong atalokba indang report magütsüdagyongi iba tatalokba ya CBI-i bushisüngdangtsü, ta sangdongogo," ta aitsü.

Bengaluru - Howrah Superfast Express train aser Shalimar-Chennai Central Coromandel Express nungji passenger 2,500 dak tema liasü.

Taoba Hokolbar aonung 7:00 ako meta Coromandel Express train jagi merang bener anena aliba train dak tsükoktsüba lendong nung nisung 288 asü aser noklang aika yirua liasü.

### Tan ita PM Modi-i Egypt semdangtsü



New Delhi, June 07 (Agencies): Tan ita Ato kilonser, Narendra Modi-i Egypt semdangtsü; ita trok tejaklen India aser Egypt nati strategic partnership yanglua liasü.

2014 küm Narendra Modi Ato kilonser akümba sülen tang mezüng pai Egypt semdangtsü aser ibaji ajanga linük ana tsüngda shishilembaba, investment, aluyimba aser defence tsütsü amalitepa inyakba jenjang ano tajungba akümtsü imlar.

Egypt ya Arab lima aser Africa nung kanga tongtibang linük ka lir, ibayongji India-i iba linük den tesendaktep tajungba akümtsü atema rangloker inyaker.

Taküm January ita nung Egypt Tir, Abdeh Fattah El-Sisi-i India semdangba mapang linük anati asalentong tsütsü parnership yanglua liasü.

Iba mapang nungji Modi aser Sisi nati taruba küm pongu tashi nungbo linük ana tsüngda shishilembabaji dollar sen billion 12 akümtsü bangjemogo.

Arrshi küm 68, Sisi ya taküm January 26 nü India

nung Republic Day sentong nung tongti tesemdang liasü. Akhidang nungi India atema Egypt ya Africa continent nung shishilembaba partner tongtibangtiba linük lir. Tang Egypt nung India nunger company 450 dak tema register süa lir aser iba nungiagi company 50 shibo sector balala nung kanga yakyaka lir; item company 50 senteper investment ji dollar sen billion 3 dak tema lir.

Testüba küm ishika tsüngda India aser Egypt na tsüngda defence aser asalentong tsütsü tesendaktep kanga junga kümogo.

Taküm January ita nung India aser Egypt Army temi tang mezüng joint military exercise agia liasü. Tarutsü nung Egypt-i India dang nungi Tejas light combat aircraft, radars aser military helicopters alizütsüa akok. Yaküm July ita nung Indian Air Force (IAF)-i Egypt nung ita ka piyong tactical leadership programme nung shilem agiogo.

Yaküm September ita nung India Defence Minister Rajnath Singh-ia anogo asemnü Egypt semdanga liasü.

### Karnataka sorkari election mapang nangzükba ajak mapa küma inyaksü

Bengaluru, June 07 (Agencies): Congress lenir aser Karnataka Chief Minister, Siddaramaiah-i, taoba state assembly election nung Congress-i nangzükba ama onük pongu mapa küma inyaksü, ta metetdaksü.

Chief Minister Siddaramaiah-i, state cabinet-i tenanzükba onük pongu nung o jungjunga lemtepogo aser tan financial year nungi inyaksü telemtetba agiogo, ta metetdaksü.

Bengaluru nung osangbenertem den jembidang pai, kin mesüra tamangba yimsü kecha mebendangi

nüburtem nem kasa teyari agütsütsü, ta metetdaksü.

Cabinet senden tembangba sülen pai, "Tanü onok cabinet senden ka menogo. Onoki tenanzükba onük pongu jungjunga shisadanga jembio. Tan financial year nungi ajakji mapa küma inyaksü onoki telemtetba agi," ta metetdaksü.

Assembly election mapang nung Congress-i nüburtem dang nangzükba onük ponguji-ita shia kibong shia nem electric light unit 200 angati agütsütsü (Gruha Jyoti), kibong shia tetsüti nem ita shia sen 2,000 teyari agütsütsü (Gruha

Lakshmi), ita shia below poverty line (BPL) kibongtem nem züngsem shia jang seret 10 angati agütsütsü (Anna Bhagya), küm ana atema graduate ser mapa mengui alir lanur shia nem ita shia sen 3,000 aser diploma holders shia nem sen 1,500 agütsütsü (YuvaNidhi) aser tetsürtem public transport bus nung angati senzüdaksütsü (Shakti) tenanzükbatem lir.

Assembly menden 224 aliba Karnataka elections nung Congress-i menden 135 nung takok angu, BJP-i menden 66 aser Janata Dal (Secular)-i menden 19 ngua liasü.

### June 15 tashi nung Bhushan anema bushisüngdangtsü: Anurag Thakur

New Delhi, June 07 (Agencies): Bodhbarnü Union Sports Minister, Anurag Thakur-i Wrestling Federation of India (WFI) Tir, Brij Bhushan Sharan Singh anema longkak aiter wrestler tem ajurua parnok den senden menogo.

Senden tembangba sülen Anurag Thakur-i, WFI Tir Bhushan anema bushisüngdangba maparen June 15 tashi nung renemtsü, ta metetdaksü.

"Ni wrestler tem den ghonda 6 tashi o lemtepogo. Onoki wrestler tem dang, June 15 tashi nung bushisüngdangba renemtsü aser chargesheets agütsütsü ta nangzükogo. WFI election June 30 tashi nungbo agütsü," ta Union Sports Minister Anurag Thakur-i metetdaksü.

Anurag Thakur-isa, "Wrestling Federation indang Internal complaint committee ka tentetsü aser iba committee nung tongtiji tetsür ka asütsü," ta metetdaksü.

Senden nungji wrestler temi akhangba onüktem metetdakja Anurag Thakur-i, WFI nungji Brij Bhushan Sharan Singh den külemi inyaksemer shinga meshimtsüla, tetsür wrestlers nem security agütsütsüla aser longkak aitba nung shilem agir wrestlers anema benoka aliba ken o ajak agientsüla, ta parnoki takhangba agütsüogo, ta metetdaksü.

Anurag Thakur-isa, wrestler temi June 15 tashi longkak aitba sentong kecha ayongzükba magütsü onoki bangjemogo, ta metetdaksü.

Form No.3 [See Regulation-15(1)(a)]/16(3)

**DEBTS RECOVERY TRIBUNAL GUWAHATI**  
Suwarna Bhawan, House No.12, New Town Path, Near Hanuman Mandir, G.S. Road, Ulubari, Guwahati-781007 (Assam)

Case No.: OA/107/2023  
Iba Act nung section 19 kübok sub-section (4) aser Debt Recovery Tribunal (Procedure) Rules, 1993 nung rule 5 kübok sub-rule (2A) nung ajemdaker jaoker.

Exh. No.: 3274

**STATE BANK OF INDIA**  
-VS-  
**CHINNY MAGH CHINNY MAGH**

To,  
(1) **SMTI NOAMI BUKH**  
WIFE OF SRI CHINNY MAGH HOUSE NO.40 KENUOZOU HILL LOWER KENUOZOU COLONY KOHIMA NAGALAND, KOHIMA, NAGALAND - 797001

**JAOKER**

**31.05.2023** anogo nung Hon'ble Presiding Officer/Registrar matsüngdang OA/107/2023 benoka liasü.  
Sentsüh **Rs.3628441.09/-** atema iba Act kübok section 19(4) application nung ajemdaker na anema (OA) benoka Hon'ble Tribunal-i jaoker/ notice agütsür (application den documents copies densema lir).

Iba Act nung section 19 kübok sub-section (4) nung ajemdaker na, defendants dang tekükoklen aliba tetuyuba agütsür:-  
(i) tajaba agütsüba sülen anogo semer nü tsüngda relief asoshi mepishibaji kechiba magütsütsüla, iba kuliji sayutsü metetdaksür;  
(ii) Original application nung serial number 3A kübok applicant-i shia aliba kiojen aser assets dak alia tanga kiojen aser assets sangdongtsüla;  
(iii) Original application nung serial number 3A kübok shia aliba kiojen aser assets ayoktsü mesüra item kiojen atema inyaksangshitsü memelar;  
(iv) Security interest atema inyaksangshiba dak alaka Tribunal dang nungi jelia temelaba magii original application nung serial number 3A nung shia aliba kiojen mesüra tanga assets ayoktsü, lease asütsü mesüra tanga kecha inyaksangshi masütsüla;  
(v) Ordinary business ajanga secured assets mesüra tanga assets aser kiojen nungi yokzükba senji security interest soita aliba bank mesüra financial institutions indang account nung deposit asütsüla. Nü dang tezüluba nung sangdong applicant nem agütsütsü tuyur aser **16.06.2023** anogo nung anepdang **10:30 ako nung Registrar** matsüngdangi arutsü tuyur, yamaji meinyakra application ji angadangtsü aser na meliaka telemtetba agütsü. **02.06.2023 anogo nung tsünglanglen kü meyongnem den iba Tribunal indang seal agütsür:**

Registrar,  
Debts Recovery Tribunal, Guwahati.

**Bank of Baroda** बैंक ऑफ बरोदा

**NAGA BAZAR BRANCH**  
Razhu Point, Main Road,  
Kohima, Nagaland- 797001  
Email: vjkohi@bankofbaroda.co.in

[Rule 8(1)]  
**KIOJEN AGIADOKBA NOTICE**

Securitization and Reconstruction of Financial Assets and Enforcement of Security Interest (Second) Act, 2002 aser Security Interest (Enforcement) Rules, 2002 nung Rule 3 kübok Section 13(12) nung agüja aliba tashi amshia tsünglanglen sign süa aliba **Bank of Baroda, Naga Bazar Branch** nung Authorised Officer-i **21.02.2022 anogo nung Demand Notice** ka ajanga sen apur **M/S. ACME CONSTRUCTION, Prop: VESATO THELUO** dang notice agütsüba anogo nungi tenzükba anogo 60 tsüngda notice nung shia aliba ama **Rs. 27,49,616.00 (Twenty Seven Lacs Forty Nine Thousand Six Hundred Sixteen only)** agütsütsü metetdaksü.

Ajisüaka sen apuri senji magütsütem nung sen apur aser public dang ya sangdonger- tsünglanglen sign süa aliri iba Act nung Section 13 kübok Sub-section (4) aser Security Interest (Enforcement) Rules, 2002 nung Rule 8 kübok pa/la nem agüja aliba tashi amshia **2023 küm June 6 nü** tsünglanglen shia aliba kiojen agiadokogo.

Talisa sen apur aser public dang iba kiojen dak sendakba kecha inyaksangshi masütsü metetdaksür, aser kari danga tetuyuba anema inyakra Bank of Baroda-i **Rs. 27,49,616.00 (Twenty Seven Lacs Forty Nine Thousand Six Hundred Sixteen only)** den sen tetemlok meshitsü.

Sen apur dang Section 13 kübok sub-section (8) nung ajemdaker mapang shidak nung item kiojen alangzüktsü metetdaksür.

**Kiojen osang tejangja:**  
Khruchiezhu Jotsoma, T. Khel, Model Village, Kohima, Nagaland nung Vesato Theluo tenüng nung aliba Patta No.8516 (New), Plot No.5631 nung ali tasazük 4450 sq. ft. nung aliba ajak den kiojen.

**Arrotsü:**  
**North tsütsülen:** Nagi Clan, **South tsütsülen:** Sekhose Clan, **East tsütsülen:** Approach Road, **West tsütsülen:** Jotsoma Village Land.

**Date:** 06.06.2023 **Authorised Officer**  
**Place:** Kohima **Bank of Baroda, Naga Bazar Branch**



## TIR YIMYIM YIMOBILEM (EDITORIAL)

DIMAPUR YANGTEPNÜ, AAMI (JUNE) 08, 2023

### Takar asoshi dang bilemba sentong!

**N**agaland nung government-i kaketshirtem dang meranga azüngtsü ajungshir, anungji meranga zünger class ter aser 12 nung takok angur, saka class ter nung takok angurtem nem class 11 nung amentsüsa tazüngdak kaketreju magütsüteter aser class 12 nung takok angurtem nem college nung azüngtsü menden magütsüteter. Kasaji, kasa government-i lanurtem dang peisasa pei akok mapa tenzüka inyaksü ajungshir saka Xerox dokan la lapoka aotsü asoshia electric light magütsüteter. Tanü iba ama tia ka nung Nagaland nokdaka lir, joko telaor aser lanurtem jagi pei kümnüba government tali tali kümyonga aotsüba dang anendaka lir. Iba ama tensa tia ka ajurudang, Nagaland state atema ya shirnokisa sentong yangluar na (?) ta metetnüa bilemer. Küm ishika jakdang Nagaland nung aliba town-tem nung town committee liasü saka tajungba asütsü bilema town committee-tem agi kar Municipal council aser kar Town council ta melen saka tangbo item council-temjia tamakitsü kümogo. Ano, iba dang nungi tamajungba aser takoksa tuluba asütsüsa tang atalokbaji, Nagaland state government-i high school-bo aika lapok saka high high school nung azüngertemji class 10 ajanger class terka nung azüngtsü atema Govt. Higher Secondary school-bo melapoktsü, anungji class ter nung takok angur kaketshir aika, temeimsüka, tazüngdak maka shisabolu tia nung lir. Atangji, class 11 aser 12 nung azüngtsü purtem asoshi 'private school' aika lir. Ajisüaka, itemji takartem asoshi dang lir, kechiyong anogo shia pei poksüng bushia ayanger chirnurtembo private school nung fee agüja mezüngdaksütettsü. Iba timtem aser nüngdakji rajema tamalen government nung sentong yanglurtemibo government school aser college lapoka tanurtem angati züngdaksütsü asoshi sentong (Free Education Policy) yanglu. Iba jagiang sensaker tanurtema school azüngtsü jangrartem tashibo kecha tetsüdak melii government-i lapokba kaketreju nung kaketshisatsü tajung ngua azünger. Ajisüaka, tanü asüng state nung sentong yanglurtemi state nung government school lapokba nükjidong ya amadoker, tanurtem ajak private school nung azüngtsü amai bilema government school-tem nung azüngertem asoshibo shisabolua bilemja sentong yangluba mangur. Aji takar chiri ayatzüra memetet amai lir. Asenokbo yimya aküm aser asen tangatetba agi ojangji, government school-tem yabo government nung yimsüsür, ketdangser aser tesayurtem chirnurtem azüngdak masü, kechiyong parnokbo takar anungji parnok chirnurtem asoshibo Nagaland nung government school aser college kata maliyonga kecha balaka shisabolutsü mali, parnok atemabo private school peria dang lir. Iba tangatetba nung tanü Nagaland Education Policy aoer. Iba jagi Nagaland nung education department yabo ita sen achir ishika shimtsü atema lapokba department amai ka dang kümogo. Aji oda, Nagaland küm 60 nung Education minister, Commissioner, Secretary, Director aser tular zünger mezüngma purtemi Nagaland nung class ter nung takok angurtem nem class terka nung azüngtsüsa menden magütsütetba aser class 12 nung takok angurtem azüngtsü atema college merenemtsütetbaji tamakok dang masü saka sensakerter mezüngmeshiba mapa ka lir. Talisa, taküm Tuensang district nungbo class ter nung takok angurtem tesadang ka nem government higher secondary school-tem nung menden magütsütetba ajanga timtem tulu ajurua lir. Parnokji tangalen private school nung azüngi moutettsü, kechiyong sensaker. Kasaji, Nagaland district ajak nung sensaker tsürabur aser tanurtem ola madoki timtemdagi. Nagaland sentong ya election nung adoker government akümsü raktepba aser transfer aser posting inyaktepba aser Fund adjustment aser Commisison atema bilemba sentong dangbo masütsüla. Tanü class A nung azüngertemji küm 12 lir külen kong kechi züngdaksütsü aser ano tanü class 11 nung azüngertemji küm ana lir külen kechi kong züngdaksütsü ta asüba shisabolu agi Nagaland nung Naga nung dak apet 'Education Policy' yanglutsüla. Aji oda, sensakba agi tanur ka school aser college mezüngtettsüsa government sentong malitsüla. Tesasatsüka, tang Nagaland Education Policy yabo Nagaland ajungtsüba masü 'Civil war' adokdaksütsüba sentong yangluba ka dang mesük.

## OLEMSABANG

### LKM-i AYONGBA WORLD ENVIRONMENT DAY AJANGA TULI NUNG ALIR ASOSHI TAJUNGZÜK TULU LIASÜ

~ Mr. Meyitongpang, General Secretary LKM

Langpangkong Kaketshir Mungdang (LKM) ajanga 5th June 2023 anogo nung Langpangkong nung tarutsü tia ajiteta Tuli Town Hall nung World Environment Day Omen: 'Sustainable Development' nung ajemdaker sentong tajung monga liasü. Iba sentong nung Ms. Sentika Jamir APY, Luyong Baptist Arogo-i sentong ani aser Rev. C. Tongpang pastor TLBA-i Sendong tenzüka sarasadem. Iba sulen Mr. Imlinok LKM Tir ajanga tesentepertem pela agizükba den külemi Mr. Olemmar Tir Tuli Area Coal Mining Association, Mr. T. Nukshi Yaden chairman Tuli Town ward Union, Mr. Marsanen Imsong Tir Langpangkong Tzükong Mungdang (LTM) ajanga tajungshi O jembu. Saya tajung ka Govt. Higher Sec. School Tuli ajanga sayu. Shri. Shaying Sheu (ADC) Tuli ajanga short speech agi aser Ms. Nungdennungla-i Ken aten. Er. Benjongtoshi Assistant Mining Engineer, Dept. of Geology and Mining, Govt of Nagaland aser Shri. Ailong Phom Assistant conservator of Forest, Tuli Range Incharge, Dept. of Environment, Forest and climate change Govt. of Nagaland na resource person liasü. Olemtepba mapang Mr. Manen Pongen LKM Executive ajanga agi aser Mr. P. B. Wati Jamir Pastor Incharge TTBA ajanga sentong tempanga sarasadem. Iba sentong nung Langpangkong Tzükong Mungdang (LTM), Langpangkong Watsü Mungdang (LWM), AO Kaketshir Mungdang (AKM), Tuli meketa aliba yimsusurtem (Village council) aser Tuli nung aliba tongtipang unions aser organisation balala jaoka among. Iba sentong Tuli Town Ward Union ajanga host sua liasü.

Tarutsü lanur putu asoshi Senmang balala tsürapurtemi rezüngtsüaka ali tsü mopung kümzüka aser wazüka meyutsüra item ajak amajok aser alima tsü mopung tajung wazüka yutsübaji dang tarutsü lanur kaketshir asoshi senmang tuluba aser tongtipangba ta angateta iba sentong ayonga LKM Tir ajanga tesentepertem nem metetdaksü. LTM Tir ajanga O tajungka yamai ashi 'Alima tzü aser mopung raksa-a takar akümer nisung tangji 'Tamachi Takar' ta ajatsü tim ta pai shia liasü. ADC Tuli ajanga yamai ashi; Kohima nung tanübo squash masü saka naring (Orange) dang kanga talubusoa adokbaya odang masü saka alima tzü mopung melenshiba ajanga lir ta ashi. Iba sentong sulen LKM ajanga ali Tzü mopung asoshi temelenshi bener arutsü sendong tajung apiteta (Innovation ideas) inyaknura sorkar (Administration) ajanga yaritsü aser külemi longjemmer inyaksü molunga lir ta pai sa ashi.

(Maneni asüng adok nung...)

## AOR MOATSÜ

~ P. Renthly Jamir

(Yashi adok nungi...)

Tanü lanurtemi moatsü ya anogo troknü shi den yi den talubosa chiyungtepa amung ta jembir. Alemli sensak yimkong nungbo takar tsüktem agütsürji kibong asem pezü dang liasü. Iba den pei chi chiyonger ishika tanüngba ajakji sensakpu tanü aaba chiyungtsü pur tesa liasü. Onok lanuwa limapura teimba arogo nung ishiba ta liasü. Anungji moatsü maparen akhi ama shitak munga aru. Anogo asem nü amung asem nü amungbajia sensaker atemabo achiasüng masü atangashi kümbu timtem liasü. Iba jagi angatettsü akhi moatsü ken ka yangi zülutsür.

Oh menang ali pokarer

Oh pamatemi mungukani,

Ashi aya nung nüjem naroe dang

Kulizünger bangnepangata

Shia chiyonger jentem nung ajurur ni :

Oh mongpu yongyatsü ya shir sentongako

Jami Longküm medemtsüka

Yimkong tsüngrem külemnü koha madener.

Ashi yawara tsük asenba ale semki ajak moluzüka jemdanger moatsü atema takari jen lapotsür. Saka tsüktem agütsütsü kuli sür (pari magütsüra onoki meshitsütsü) nüngdaker. Anungji moatsü longsoa amungtsü mechi arju nungeri kuli sütsür. Shirnok dang kulizünger ta ajar. Joko ozü nema yimchi asembo meshijangni ta tebang aneptsüba dang. Moatsü nung tamunger mali shitui süzüng atepi oma, yimer ajak medema amungtsüba sür nung nübu mali. Moatsü, tang amungtsüba ya shiri ayongzük kechiba yimkong tsüngrem külem nü madener ta ken atener.

Oboula nung mapang arür tsübu külen tang achitsü maka sensakpu chikong mangu anünger teimba ta liasü. Anungji moatsü indang jembirtemi tanü sensaker kata mali Chima yima nung aliba jenjang nung rangloker mejembitsüla. Ano temenen putu nung libaliruba yimya melentoker Aor moatsü benjongji tanü tamangba yimsü den apet asüngteta amungtsü merangdi ta ayongzük.

**Iba Olemsabang nung lemsaba ken-o aser shisatsü ya iba ocet züluri  
bilemba ken-o ama tazünger angateta agitsü mepishir**

## Uttar Pradesh nung Pastor Kirubendran jail nungi chiokogo



Pastor R. Kirubendran, pa kinüngtsü Manju Tiruvendram aser arrshi ita 18 jala noksa nung angur.

**New Delhi, June 07 (Agencies):** Uttar Pradesh state nung Pastor R. Kirubendran ita ka shi jail nung amongba sülen bail nung chiokogo; par kibongi küm aika nūburtem tenzüka aru, ajisüaka Hindu yimsü alia amangertemi dang masü saka police, osangbenertem aser yimdaklirtemia parnok anema apuso.

Uttar Pradesh nung Ghaziabad district kübok Kasimabad jila nung pastor Kirubendran aser pa kinüngtsü nati tesüiba küm 6 tenzüka arudang parnok kecha timtem majuru liasü, ajisüaka Hindu yimsü alia amangertemi anti conversion ozüng kübok tai tongloktsüba sülen police-i apu.

Kangshia tangartem Khristan yimsü dangi meyipdaksü, ta tai tonglokja pastor Kirubendran apuba sülen pai pezüben tashi bail meshi saka magütsü; tesüa May 24, 2023 nü pa bail nung chiokogo.

Pa kinüngtsü Manju Tiruvendram den arrshi ita 18 kinü jala-a apu saka anogo 13 dang jail nung puokba sülen tenabo May 6 nü chioka liasü.

Pastor Kirubendran-i, tesüiba küm trok tashi pai Kasimabad jila nung tenzüka mapa inyaka arudang pai timtem kecha majuru, ajisüaka ajungbena pa nem tai tongloktsüba ajanga pa kanga süngmanger, ta metetdaksü.

Osangbener den jembidang pastor-i, "Onoki timtem kecha majangshii liasü saka ajungbena Amongnü anogo ka nung [April 23] lokti kati onok

nem tai tongloktsü. Onoki yangi tekülem agi tenzüka mapang nungi shingaia onok anema meinyak," ta metetdaksü.

2017 küm nungi tenzüka pastor Kirubendran aser Tiruvendram nati yimdaklirtem nem angati shisaliok agütsür aser ibaji ajanga tanur 60 shi tajangzüik angur. Hombar nungi Honibar tashi tenati tanurtem dang anogo shia ghonda anana

(2) area nung aliba school syllabus nungi tanurtem dang lesson sayua aruogo.

Pastor Kirubendran-i, "Rongsen akar kibongtemibo pei tanurtem coaching class-i yoker aser iba atemaji sen aika agütsüteter. Ajisüaka sensaker tanurtembo koda? Kü kinüngtsü künati sensaker tanurtem shisaliok atema tebilemtsü katsüba ajanga künati parnok dang lesson sayutsü telemteba agia liasü," ta metetdaksü.

Pastor kinüngtsüi, "Onok ket nung sen mali, anungji onoki senotsü agi meyaritetyonga tanga lenmang balala ajanga parnok yari, nisung kar rongdak süa hospital-i aotsüsa aküm nunga künati parnok meinasa ao," ta ashi.

Pastor aser kinüngtsü na ya Tamil Nadu kübok Coimbatore nungi lir.

Tiruvendram-i, "Kibuba tenzüksü atema khuret tulu bener onok north India-i aru. Onoki aibelena meinyakyonga jail nung puok," ta metetdaksü.

Pastor-i, ozü Arogo nungji nisung 90 shi adener, ajisüaka tangbo tekülem sentong asentenshir agitsüji tamakoktsü kümogo, ta metetdaksü.

"Onok Tenla ki, ki kiburi Tenla kikümbang aou agi nokdangogo. Parnok ya temaba kin nisung. Parnok takar aser tashi tulu lir. Kü taküm lendong nung lir. Onoki aibelena mali, ta kuli sayutsüsa akümtsü," ta pastor-i metetdaksü.

Attorney aser meimchir temeden atema inyaker, Dinanath Jaiswar-i, April ita nung Amongnü shia Hindu yimsü alia amangertemi iba district nungji Tenla kitem mita ao, ta metetdaksü.

Osangbener den jembidang Jaiswar-i, "April ita nung Amongnü shia Ghazipur District nung Tenla kitem mita ao. Yangji aliba right-wing telok balalai Tenla ki ajak jangjaba sülen Tenla kitem mita ao aser pastor tem nem tai tonglokja jail-i nung puok. Yamaji parnoki district nung Tenla ki ajak shibangtsütetogo," ta metetdaksü.

2021 küm Uttar Pradesh Prohibition of Unlawful Conversion of Religion Act, 2021 agizük. 2020 küm December ita nungi tenzüka taküm May ita tashi nung Uttar Pradesh nung nisung 234 pua jail nung puokogo, ajisüaka tang tashi iba ozüng kübok shinga aija mali; taküm küm kija nunga Uttar Pradesh nung Khristantem anema inyakba tatalokba 115 lir, ta Jaiswal-i metetdaksü.

## ANOGO ABEN TSÜNGREM DEN

### Mozü Tajung

T. Ken 107: 16 - 21.

Tenüngsang ken 107 nung temenen aser tekümtet noksa dena lir. Temenenji tashidak aser tekümtetji mozü den atishitepa zülu. "Parnok tamajung mapayong, aser parnok tai mapayong tamashi aser timtem-toushia lir. Pai Pa O yok aser parnok aneptsü aser parnok tesamatsü nungi kümzük" ( t. 17, 20).

Tashidakji miyima tenzüker. Ne temangi miyima aiter aser miyima ainer. Idangji iba yagi ne temang nung tashi ajak meseptsü tenzüker. Chiyongtsü mejangrar aser ajemtsü mejangrar aser tashi mait küm daksür. Taneptsü langka meinyakra iba yagi na sūdaksür.

Yamaji temenenji lir. Iba lendong mangatetti nisungi temenen den asayar. Ibaji cancer aser AIDS züpazüpa amshiba ama lir. Temeneni tasüba bener arur. Taneptsüji Tsüngrem Oji lir. Tsüngrem O agi mesüra tanga mozüi temenen tashidak aneptsü makok.

Laishiba temulungjang tashidak aneptsütsü akok. Shirnok temeneni menenja lir parnok iba yagi aneptsütsü akok. Saka shirangeri tamang agi atongtsüla aser nüngdakji nangzüka bendanga agütsütsüla. ( Matt. 9: 12). Asenoki asen sasa aneptsü makok ta nangzüksüla aser shingai yaritsü makok ta ashitsüla.

Khenkhenbo mozü angutsü tasak akümer aser jenjang tasak agi angur. Saka Tsüngrem Oji angati aser ajaklen angur. Iba yagi tanelaren mekokmein ajak aneptsür.

Ne taküm temenen ajanga raksaja lira nai itemji nangzüksüla aser teyari asoshi Kibuba atongtsüla. Ne tanela anebalutsü kodanga menua teli. Tsüngrem O ji zügang aser ibaji amshitsü Tanela Temeshi dang yariang ta shiang.

## Christian & Missionary Alliance-i tetsürtem-a pastor shimtsü

**June 07, 2023:** Taoba hopta Christian & Missionary Alliance (CMA) mungdang nung vote agütsütepa tetsürtem nem pastor shilem agütsütsü telemteba agiogo.

CMA nung Arogo 2,000 dak meta lir. Taoba hopta Spokane, Washington nung CMA 2023 General Council nung adenertem shilem 60 dak temai tetsürtem-a pastor shimtsü atema vote agüja liasü.

General Council nung adenertem shilem 60 dak temai 'CMA Statement of Faith' pusema vote agütsüogo, anungji tang nungibo local Arogotem aser Arogo ketdangsertem rongnung tetsür-tebur ajaki "pastor" mesüra "reverend" nungja amshitsü akok.

Iba tetezü pastoral mapa atema tetsürtema ordain asütsü, ajisüaka Arogo nung tongti pastor bo tebursa asütsü.

CMA Director for Media Relations, Peter Burgo-i, "Iba sangdong ajanga tarutsü nung lanurtemi iba teratet jungjunga jangjatsü aser tapet asütsü; Tsüngremi tetsür aser tebur naprongla yanglu," ta metetdaksü.

"Tetsür aser tebur naprongla theological aser tanela tsütsü qualifications ji kasa dang lir, anungji Alliance General Council 2023 nung adenertemi, Arogo nung inyakerterem ajak-tetsür aser tebur naprongla ministry atema temsüa dang lira 'Ordained aser Consecrated' ta züngshitsü telemteba agiogo," ta pai metetdaksü.

Burgo-i, U.S. Alliance Arogotem nung tanela tsütsü tetsürtem lenisüba nung tangatetba balala lir, ajisüaka Arogo karbo tetsürtem lenisüba nung tenzüka lir, ta ashi.

"Iba onük nung Arogo ajak nem tetuyuba magütsür, ajisüaka peipei Arogotem nung Arogo sasep aser minsitry sasep nung Arogo nung tongti aser governing boards-i pei dak apet inyaksangshitsü asoshi General Council-i bangzüng renemogo," ta pai ashi.

"Iba ama temeden agütsüba ajanga tarutsü asoshi onok tashi taitba akümtsü aser telongjemba akümtsü, ta onoki amanger," ta paisa shisem.

Taoba ita U.S. Alliance Tir, John Stumbo-i video post ka ajanga, "Onoki tan putu atema

(CMA Statement of Faith) terajemba küm daksür aser tesüiba mapang metokmeperi aliba metongshia tashi taitba küm daksür, ta ni amanger," ta metetdakja liasü.

US nung aliba CMA Arogo 2,000 dak tema nung züngsem 500,000 dak tema lir aser CMA nungi missionary 700-i linük 70 nung missionary mapa inyakdar. Taküm CMA General Council ya 2019 küm tenzüka "national conversation" tembangba sentong ka liasü.

2021 küm interview ka nung jembidang CMA Tir, John Stumbo-i, theology tsütsülen nungi o entepba sendoker Laishiba nung rangloker o lemteptsü, ta metetdakja liasü.

Roman Catholic Church, Orthodox Church aser Southern Baptist Convention-ibo tetsürtem ordain asütsü memelar, ajisüaka tanga denomination-a aikati Arogotem nung tetsürtem pastor aser putir shimmer.

United Church of Christ, United Methodist Church aser Presbyterian Church (USA)-ia vote agütsütepa tetsürtem ordain asütsü melaogo.

**AO OSHI ANGAZÜKDAK:**  
**TANÜ ANGAZÜKTSÜBA OJANG**



**Rangma**

(v) Süngrangtsü amshia inyakba mapa adem (completed sawing work)

\* Arogo nunger tenla ki asütsüba süng ajak tanü rangma.

**Rangpang**

(n) tu talang ser techira aketba tzütok, atsüng (reed)

\* **Rangpang** ya ayongküm nung meyrir.

**OLONG PAITEP # 6539**

1		2		3		4		5
			6		7			
8								
					9			
		10						
11								12
				13		14		
15								
16						17		

**TIPIEN**

- 1. Nüji masü - (4)
- 3. Techinütsüka - (6)
- 7. Aketa shirangba - (5)
- 8. Pi - (6)
- 9. Amena - (5)
- 10. Kinü - (5)
- 11. Tanang masü - (5)
- 13. Lenmang - (6)
- 15. Nübo tedi - (5)
- 16. Tuoshi - (6)
- 17. Shiruru apuba temenatsü - (4)

**LANGTSÜNGLEN**

- 1. Jila tulu - (5)
- 2. Sarasademdang tembang - (4)
- 4. Tarutsü indang ashirtem - (6)
- 5. Alia - (5)
- 6. Mojing - (5)
- 9. Tai inyakba metet - (5)
- 10. Medemer chijiba - (6)
- 11. Tatokba / Amadok - (5)
- 12. Anüngdang masü - (5)
- 14. Jabaso masü - (4)

**OLONG PAITEP # 6538 TELANGZÜBA**

**TIPIEN :**

- 1. Tesangra, 5. Mungo, 7. Kisen,
- 8. Salem, 12. Semki, 14. Kilem,
- 15. Kensü, 16. Sangpang.

**LANGTSÜNGLEN :**

- 1. Temesen, 2. Raksa, 3. Aon,
- 4. Aso, 6. Nile, 9. Alizüng,
- 10. Omen, 11. Lemta, 13. Ola,
- 14. Kin.



**Agüja  
aliba  
noksa  
nung**



**meputepi  
aliba 7  
bushiang**

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

**Manipur nung khasetba BSF constable mang West Bengal tongogo**



Manipur Chief Minister Biren Singh-i BSF constable Ranjit Jadav nem tetushi agütsüba angur.

**Barrackpore, June 7, 2023**

(Agencies): Manipur kübok Kakching district nung khasetba BSF constable Ranjit Jadav indang mang par ki tonga bener ogo.

Ranjit Jadav ya Serou nung khaset aser Mongulbar nikongdang West Bengal kübok North 24-Parganas nung par Bhatpara ki tonga bener aru.

Barrackpore MP Arjun Singh aser Bhatpara municipality züngsemtem den iba tesem nung alirtemi Jadav'er kidangi oa tetushi agütsüogo.

"Pa ya kanga nüngtugu aser

tasütait liasü. Par kibong nung ya pai dang mesüa liasü aser pai pa kinungtsü Kaushyalla, arishi küm 8 tain jabaso toktsür ogo. Pa tenu tetsür ana, tebur ka, tetsü aser tebu nunger lir" ta asür Ranjit Jadav'er kidanger kati ashi.

Barrackpore MP Arjun Singh-i Jadav'er kibong nem teyari agütsütsü mulunga lir ta metetdaksü.

Jadav-i linük atema rara aser onoki pa kodanga mamatsü. Onoki sepai ka akoksaogo. Jadav'er kibong yaritsü atema onoki taintem telok ka tentettsü"

ta local councillor tem- Gopal

Routh aser Tarun Shaw nati ashi.

Iba lendong nung Jadav khaset aser Assam Rifles sepai ana yirur anepaludar, ta Army-i Mongulbarnü metetdaksü.

Teyirurtemji tayimtsü ajanga Mantripukhri-i anir ao aser telungpurtem bushidar ta Dimapur nung amenoka aliba Army indang Spear Corps-i metetdaksü.

"Manipur kübok Sugnu/Serou nung Assam Rifles, BSF & Police-i mapa inyakdar. June 5/6 aonung piyong sepaitem aser telungpurtem tsüngda khatap" ta parnokisa metetdaksü.

**Sorkar school ajak nung Assamese & Bodo textbooks amshitsü akhanger**

**Guwahati, June 7, 2023**

(Agencies): Assam state sorkari class 6 nungi tenzüka English oshi agi science aser mathematics sayutsü lemtetba anema All Assam Students' Union (AASU)-i Guwahati nung lungkak aitba sentong ka agiogo.

AASU-i testiiba mapang Assam sorkar lemtet anema ita ka piyong lungkak aittsü metetdakja lir.

"Onoki state sorkar dang

sorkar school tem nung Assamese aser Bodo indang textbooks dendaktsütsü akhanger" ta AASU chief advisor, Samujjal Bhattacharya-i ashi.

State sorkari kaketshirtem lungkak aiddaktsür aser iba atema lemtet ka agitsüla. State sorkari medium of language nung meinprong masütsüla ta Bhattacharya-i ashi.

"Assamese, Bodo aser native

language school ajak nung kaketshirtemi jungjunga jembitettsüsa English oshi sayutsüla" ta paisa ashi.

AASU-isa sorkar school ajak nung infrastructure shitak yanglutsü takhangba agütsüogo.

Assam cabinet-i July 2022 nung tan academic year nungi Class VI nungi XII tashi English oshi agi science aser maths sayutsü mulunga agizükogo.

**Tripura nung Kokborok oshi atema Roman Script meshir**

**Agartala, June 7, 2023**

(Agencies): June 7 nü Tripura nung telok 56 agi tentetba 'Roman Script For Kokborok Choba' ajanga Kokborok oshi atema 'Roman Script' meshia lungkak aitogo.

Sorkari iba takhangba melangzüra parnokki tuluba nung lungkak aittsü ta parnokki ashi.

"Tripura nung lisopurtemi jembiba Kokborok oshi ya state nütsüng yongsük asemsü nungi kasü shi kati jembir" ta Roman Script For Kokborok Choba-i ashi.

Tanü parnokki Agartala nung Kokborok oshi atema 'Roman Script' takhangba agüja lungkak

ait. "Taoba sorkar aser tang aliba BJP sorkari Kokborok oshi atema politics asayar" ta taoba minister aser TIPRA Motha lennir Mevar Kumar Jamatia-i ashi.

"Tesüiba küm 50 tashi Tripura nung lisopurtem Kokborok atema Roman script meshia arur. Oshi ya temulung taroktiba indang tebilemstü ka lir aser Roman script meshia onoki lungkak aiter" ta pai ashi.

"Taoba mapang Tripura nung Left Front sorkar alidang 'Bhasa Commission' ta ser commission ka tentet. Iba commission ajanga lisopur 80% temai Kokborok

oshi atema Roman script aginüba bushiteta liasü. Iba osang ya metetaka taoba Left sorkari mapa kuma meinyak aser iba atema sasaa bilemer. Iba ya onok indang report masü saka sorkar indang lir" ta Mevar-isa ashi.

Sorkari onoki akhangba ama mapa meinyakra tuluba nung lungkak aittsü. Sorkari parnok report magizükba ya maaksü lir. Parnoki ozü Kokborok oshi atema politics asayar. Onoki mapang talangka ataogo aser joko mapa tuluba inyaktsü. Taoba Left front sorkar aser tang BJP sorkar ozü oshi atema politics asayar" ta paisa metetdaksü.



Mizoram nung lapokba aliba relief camp ka nung Manipur nungi jena arurtem jenoka aliba angur. Manipur nungi lisopur nisung 9,501 tashi Mizoram kübok district balala nung jenoka lir. Parnok ya teimba Aizawl, Kolasib aser Saitual district tem nung lir ta Aizawl nung sorkar ketdangsür kati ashi. (Aizawl, June 7)

**GOVERNMENT OF NAGALAND  
DIRECTORATE OF SCHOOL EDUCATION  
NAGALAND : KOHIMA  
ADVERTISEMENT**

Kohima Dated the *th* June 2023

No. ED/EST/GR-IV/APPT/SDEO-PHEK/2011-12 : In compliance to the Hon'ble Gauhati High Court, Kohima Bench Judgment order Dated 17-04-2023 WP(C) No. 196(K)2015, applications are hereby invited from indigenous inhabitants for 1(one) post of Peon / MTS in Pay Matrix Level-1 at the Office of the Sr. Sub Divisional Education Officer Phek under the Department of School Education.

**Terms & Conditions:**

- Educational Qualification** : Highest class read should be indicated (along with all supporting documents i.e ST / Indigenous / Backward Certificate / Birth Certificate / Aadhar / 2 Nos. of recent passport photos.
- Age limit** : The candidates should not be less than 18 years or more than 35 years of age. However in view of the Hon'ble High Court directive, the petitioner and private respondent no 5 in W.P(C)No.196(K)/2015 shall be exempted from this age limit for this particular interview
- The application should be addressed to the Principal Director, Directorate of School Education, Kohima-797001
- Last date of receipt of applications shall be 21st June 2023
- Submission of incomplete documents shall be summarily rejected
- Preference shall be given to the indigenous inhabitants of Phek District
- Interview shall be conducted on 4th July 2023
- Admit Card shall be issued on 26th June 2023.

Sd/-  
**(THAVASEELANK) IAS  
PRINCIPAL DIRECTOR**

**Haiti nung menoknok anak; Nisung pezü süogo**



Haiti nung Jeremie yimti nung 4.9 magnitude tesashi menoknok anakba ajanga ki raksaa chireper aliba nisungtem sendena reprangtepba noksa ka angur.

**Port-au-Prince, Aami/June 7 (Agencies):** 4.9 magnitude tesashi menoknok ka agi Mongolbarnü southern Haiti kongshiogo.

Hopta tatemi tzümetüsü aruba ajanga nisung 40 dak tema taküm samara aliba mapang ka nung tang iba menoknok ya anakogo.

Iba menoknok lendong nung nisung pezü süogo aser nisung 36 yirua liasü, ta ketdangsurtemi Mongolbarnü metetdaksü.

Menoknok ya ayaterem nung tzüküm nung aliba yimti Jeremie anasa anak, ta United States Geological Survey-i metetdaksü.

Menoknok anakba sülen ki ana chirep aser Jeremie aser Les Cayes na sendaktepba lenmang tongtiba nokdanga liasü, ta Haiti indang Civil Protection Agency-i sangdong ka ajanga metetdaksü.

Menoknok lendong nung asürtem parnok asembo kibong ka nungi dang liasü. Parnok asemprongla ya ki chireper aliba ka nung agiteta liasü, kong

teküzmükertemi ano maneni nisungtem bushidar, ta Jeremie nung Haiti indang Civil Protection Agency nungi Frankel Maginaire-i AP dang ashi.

Paisa, tanurtem aika yirur mozüki dangi temang anepalutsü atema anirogo, ta ashi.

Nüburtem ki chireper aliba ka meketa adenshia taküm alirtem kümzüksü asoshi meranga liasü. Parnoki nisung ka sü agi alepbanger anir oa liasü.

Haiti indang Bureau of Mines and Energy nungi geologist aser engineer Claude Prepetit-i, Radio Caraibes dang ashiba agi, southern Haiti nung taküm menoknok tilala anoka aruogo aser iba sülen Mongolbarnü menoknok tesashi ka anakogo.

7.2 magnitude menoknok kati southern Haiti dak kanga mejungi kongshia nisung 2,200 dak tema asüba sülen küm ana shi lir tang iba menoknok anakogo. Küm ana tejakdang anakba menoknok yagi Les Cayes tamajungtiba kongshia

liasü. Taoba küm august ita pei talidak ki makai akümeritem tang tashi camp tem nung litepdar.

2010 küm magnitude 7 tesashi menoknok kati linük yimtiba Port-au-Prince dak kongshiba sülen nisung 200,000 shi asü aser iba yimti nung ki aika tagitsü makai chirepa liasü.

Hopta tatemi tzümetüsü arua nisung 42 asüba den nisung 140 yirutsüba aser ki 31,600 shi metsünga ajanga nüburtem timtem nung aliba mapang ano Mongolbarnü iba menoknok anakogo.

Iba dak sendakba nung Ato Kilonser Ariel Henry-i linük balala dang teyari meshiogo.

"Lendong agi Haiti dak tanen makai kongshir," ta Project Hope, Haiti director Didinu Tamakloe-i ashi.

"Nüburtem taoba lendong agi kongshiba ano mezüngjemeti aliba mapang ano anogo ishika tsünga tzümetüsü, menoknok aser anentsü lendong agi kongshiogo," ta paisa ashi.

**DECLARATION**

I, **Shri. Medemosang**, S/o. Temsuyanger resident of H.No. 155 at Imkonglenden Colony Dimapur District, Nagaland do hereby solemnly affirm and declare on oath as under:-

- 1) That, my date of birth was mistakenly written as on 21st April 1969 (21/04/1969) in place of 21st April 1966 (21/04/1966).
- 2) That, I was born on 21st April 1966 (21/04/1966).
- 3) That, the contents of this Declaration are true and correct to the best of my knowledge and belief and nothing is concealed thereof.

I solemnly affirmed and declared before me by the Deponent  
Notary Public / Oath Commissioner Nagaland  
Dimapur : Nagaland  
**D.K. NAGI**  
NOTARY PUBLIC

**ALI  
TAYOKTSÜ  
LIR**

Tir Village, near Ao Baptist Church  
Dry Land, Rs. 95 Per Sq.ft (Negotiable)  
Plot size available as per your budget.  
**Contact: 9612448446 / 8974571416**

**Mexico nung ngutetba tasü mang ya call centre nung inyakertem lir**

**Mexico City, Aami/June 07** temai adok.

**(Agencies):** Mexico nung longren ka nung ngutetba nisung temang shilem tendangba ajanga parnok ya call centre ka nung inyaker samar alirtem lir ta sayuogo.

Iba call centre nung inyaker lanur nisung ti tashi samaba sülen taoba hopta nisung shi rangsar yangkhu nung sepa aliba nguteta liasü.

US tourist tem külakokja sen meshitsü nükjidong nung iba call centre ya lapok südi ta bushisüngdang temi temolung meleme lir.

Parnoki iba call centre ya Jalisco New Generation cartel (CJNG) temi lapokba ama bilemer.

Iba centre nung inyaker nisung ti ya CJNG ajanga tepset asü par tsükchir cartel ajanga tepsetar ano mejangja.

Rangsar aliba nisung temang ya May 31 nü black bags ter dak tema nung seper anüolen Jalisco state kübok Zapopan nung aliba longren tarok ka nung ngutet.

State sorkari Mongolbarnü sangdong ka nung item nisung shi terangsa ya samaogo ta bushitepa aliba lanurtem indang lir.

Iba tesem nungi May 20 aser 31 tsünga tebur trok aser tetsür ana sama.

Parnok ajak ya kasa call centre ka nung inyaka liasü, koba Mexico tourist resort tem nung anisüngzüksü bushirba bendangertem ashiochtsü ta tai tonglojka tang bushisüngdangba mapang lir.

Jalisco state ketdangsurtemi asürtem indang osang tejangja balaka magütsü saka yangji aliba media temi ashiba agi asürtem ya arishi küm 23 nungi 37 tsünga lir.

Mezüng samasang ya arishi küm 31 tain Carlos García liasü aser pa tatensa May 20 nü angu. Pa indang ken o ya mezüngbo call centre den mesendaktepi liasü, kechiaser par kinunger temi ba business tilaka nung inyaker, ta ashi.

Ajisüaka May 23 nü arishi küm 27 tain Itzel Abigail aser arishi küm 23 tain Carlos Valladolid indang tsürabor temi adianuna samaba indang osang agütsü dang kasa call centre nung inyakertem samaba osang

Tanünga ajakji yutsür Carlos Garcia kinunger temi pa den tatensa May 22 nü tatensa jembia liasü.

Valladolid adianu ana nungi tatensa angashiba ya May 23 nikongdang tena gari anir aoba mapang jembiba liasü, ta par kinunger temi ashi.

Arishi küm 30 tain Arturo Robles tetsüi ashiba agi, pai la dang call centre nungi May 22 anepdang phone ajanga jembidang "Ni mapa inyakba tesem tongogo, tang süngo ajemtsü aser mapa inyak tenzüchtsü," ta ashiba sülenbo pa nungi kinungeri kecha mangashi.

Arishi küm 37 tain Jesús Salazar tetongi ashiba agi, kasa nikongdang pa call centre atongba sülen la dang message ka yokbaji tatem liasü.

Arishi küm 29 tain Mayra Velázquez, arishi küm 28 tain Jorge Moreno aser arishi küm 34 tain Juan Antonio Estrada nung kasa anogo sama.

Jalisco state ketdangsurtemi tang tashi nisung ti ya komasür, kong mesüra kechiba tepsetar mashir, saka prosecutor indang office ajanga ashiba agi, yangji alirtemi parnok dang nok-nü bena alirtemi call centre nung inyaker kar pua bener aoba nguogo ta ashiba sülen CCTV footage tem repranger.

Call centre telung nung police temi ganja, azü mezüia aliba juli aser whiteboards nung bendanger tenüng zülua aliba angu, ta osang ajanga ashi.

Iba ki kibur ya police temi jaoka lir.

Iba call centre alidak Zapopan indang mayor-i ashiba agi, business ya ozüangi memelai inyaka liasü aser licences kecha mali.

"Iba ki ya temelaba kecha maka lapoka liasü, aser onoki junga reprangdang call centre shidak masü liasü, ibai ozüangi alema mapa tamajung inyakba tesem ka liasü," ta mayor-i ashi.

Milenio osangkaket ajanga ashiba agi, US aser Canada senso tem külakokja maliba ki o jen ayokba nung iba centre ya amshi. Iba mapa nungi tajangzük anguba sen Jalisco New Generation cartel (CJNG) züngsem nem itasen agütsü, ta ashir.

# Women's Champions Trophy tasembuba anogo asaya osang

**Dimapur, Aami/June 7 (TYO):** Tang asaya aliba 2buba women's Championship Trophy nung Bodhbarnü Nagaland Cricket stadium nung mezüngbuba asaya Saramati Warriors aser Tiyi Strikers na asaya aser Saramati Warriors-i wicket 10 agi asaya koka liasü.

Team anapronglai mezüngbuba asaya akokba sülen temaba jenjang nung tembangsü asoshi iba asaya ya kanga tongtibang liasü.

Toss akokba sülen Saramati Warriors-i mezüng field asütsü shim aser Tiyi Strikers nem run 118 dang yangludaksü. Strikers atema captain Sentilemla-i

maneni kanga junga asaya run 88 yanglu, ajisüaka la nem teyari agütsür maliasü aser lar team-i ajak senteper run 118 dang yanglutet.

Saramati Warriors bowler tem rongnungi Watinaro aser Sariba nati wicket anana aser Nitu-i wicket ka agi.

Asaya tanabuba shilem nung Warriors pur opener Jyoti Thapa-i run 48 aser Vipeni-i run 39 yanglua tenati dang over 19.5 nung run 119 yanglua asaya akok. Iba asaya akokba sülen point table nung Saramati Warriors puri point 6 nguteta parnok temaba jenjang nung lir.

Iba asaya atema Player of the Match naroküm Saramati

Warriors nungi Vipeni nem agüja liasü.

Nagaland Cricket Stadium nung tanabuba asaya Pauna Queens aser Terogvu Titans na tsüngda aser Sovima Cricket Ground nung 3buba asaya Japfü Dazzlers aser Puliebadze Slingers na asayatsü liasü, ajisüaka tzünglu aruba ajanga masayatet.

### **Brehostibarnü asaya:**

Nagaland Cricket Stadium 8:30 A.M: Puliebadze Slingers vs Pauna Queens

12:30 P.M: Saramati Warriors vs Terogvu Titans Sovima Cricket Ground

12:30 P.M: Japfü Dazzlers vs Tiyi Strikers.

# 132buba Durand Cup August 3 nü tenzüktsü

**Aami/June 7, 2023 (Agencies):** 132buba Durand Cup indang Local Organizing Committee (LOC)-i iba asayamung ya Meghalaya yimtiba Shillong aser Assam kübok Kokrajhar nunga asayatsü ta sangdongogo.

Iba asayamung ya India indang domestic footballing calendar tenzükba asayamung ka ama asayar arudar aser alima nung asayamung tejentiba rongnung ka lir. Asayamung ya August 3 nungi September 3 tashi asayatsü.

Taoba küm iba asayamung nung India nung nungtu football asayar Sunil Chhetri-i pa indang career nung iba asayamung mezüngbuba koka liasü. Pa Bengaluru FC nungi asaya aser parnoki final nung Mumbai City FC 2-1 agi koka liasü.

Sentong nung o jembiba mapang Lt. Gen. R.P. Kalita PVSM, UYSM, AVSM, SM, VSM, General Officer Commanding in Chief (GOC-in-C), Eastern Command-i, "Durand Cup ya Indian Armed forces aser Indian Army atema sobaliba ka lir aser Indian Army-i iba küm noklang ka dak tema asayamung ya kanga nümadanga ayongzüker.

Onoki taoba küm iba asayamung ya northeast-ia atsülanga oner ta shiogo aser taküm Shillong nung iba asayamung ayongzüka asayatsü pela bilemer. Kokrajhar nunga iba asayamung asayatsü aser iba ajanga Assam aser talisa NE nung iba asaya kanga renloka aotsü asoshi teyari agütsütsü. Assam aser Meghalaya sorkari teyari magütsü asübo iba ya mataloki lila. Maneni West Bengal sorkari iba asayamung teti danga nungtia asaya arudar," ta ashi.

Yimti tasen nung asayaba dang masü 132buba Durand Cup nung nungtu Shillong Lajong football club dena asayaba angutsü. Indian Super League team 12 prongla, Indian armed forces nungi team pezü aser I-League club kari iba asayamung nung shilem agitsü. Taoba küm iba asayamung ya Imphal kübok Khuman Lampak stadium nung asaya liasü. Ajisüaka tang Manipur nung mepetmesü adoker aliba ajanga asayamung belener aotsüsa aküm. Taküm iba asayamung ya Kolkata, Guwahati, Shillong aser Kokrajhar nung asayatsü renema lir.

# Sorkari sensaksem atema wrestler tem jaokogo: Sports Minister



**New Delhi, Aami/June 7 (Agencies):** Union Sports Minister Anurag Thakur-i, Wrestling Federation of India (WFI) tir Brij Bhushan Sharan Singh anema longkak aita aliba wrestler tem sorkar den sensaksemsü atema jaokogo.

Thakur-i Mongolbar aonung menor Twitter ajanga ashiba agi, sorkari ken o dak sendakba nung wrestler tem den sensaksemsü mulunga lir. "Ni sensaksemsü atema maneni wrestler tem jaokogo," ta pai

ashi. Longkak aita aliba wrestler temi Home Minister Amit Shah den ajurutepba sülen anogo ishika lir Sports Minister-ia parnok jaokogo. Amit Shah den ajurutepba mapang parnoki ochi obendang ka asoshi takhangba agüja liasü.

Parnoki BJP MP Brij Bhushan Sharan Singh anema longkak aita arudar aser pa aputsü takhangba agütsüogo. Tetsür wrestler kari, pai parnok dak mebenshitsü yimya

benshiba indang ashishia liasü, koba Singh-i magizüki arudar.

Anogo ishika tejakdang Delhi Police-i Singh den sendaktepa alirtem aser Uttar Pradesh kübok Gonda nung par kidang mapa inyakertem kar dang ken o ashishiogo, ta ketdangsürtemi metetdaksü.

Parnokisa, aiür chanu kati ashishiba koba Protection of Children from Sexual Offences (POCSO) Act kübok Singh anema benokba ken o tamendakdak lir iba ya tanaben Code of Criminal Procedure (CrPC) section 164 kübok mangaokshiogo, ta ashi.

Wrestler tem ya Delhi kübok Jantar Mantar tesem nung May 28 nü tashi longkak aita mena liasü, ajisüaka Delhi Police-i iba tesem azüngtettsüogo.

Police temi parnok mintokba sülen wrestler tem Haridwar-i parnok indang medal tem Ganga ayong nung intoktsü atema ao. Ajisüaka parnok indang medal tem ya aluyimer lenirtem nem bendanga agütsüogo aser parnok tenüng nung telemtetba agitsü atema nongloktsüogo.

# Moeen Ali Ashes asayatsü atema meyipa arutsü



**Aami/June 7, 2023 (Agencies):** England nung all-rounder Moeen Ali shiba 2021 küm September ita test cricket asaya nungi anena liasü, pa Ashes nung mezüngbuba test ana atema team nung züngoksemogo, ta linük cricket board (ECB)-i Bodhbarnü sangdong ka ajanga metetdaksü.

Spinner Jack Leach masayatetsüsa akümba sülen Ali team nung aniokogo.

Arishi küm 35 tain asayar ya limited-overs cricket dak rangloker asayatsü atema test asaya nungi anen ajisüaka test captain Ben Stokes, coach Brendon McCullum aser ECB men's managing director Rob Key nung den sensak asema sülen pa telemtetba melenshiogo.

Moeen ya mezüngbuba 2014

küm test asaya aser 2021 küm September ita India den Oval nung tatembangbuba test asaya liasü. Pai test 64 nung run 2,914 yanglu aser wicket 185 agir liasü.

"Onoki iba hopta tetenzüklen Mo den tongtepratepa pa tanaben test nung asayatsü asoshi asüngdanga liasü. Anogo ka ana bilemdangba sülen pa squad nung densema test cricket maneni asayatsü yongya atadar," ta Key-i ashi.

Leach shibai, Ireland den warm-up test nung wicket pezü agia liasü, pa teberem yiruba ajanga Australia den asayatsü aliba test asayamung nung shilem magitettsüsa kümogo.

Jofra Archer yiruba ajanga masayatetsüsa akümba sülen tang Leach yiruba ajanga team nung tetsükdaksü adokogo.

Ashes ya Edgbaston nung June 16 nü tenzüktsü.



Yangon, June 7 : Thuwana Stadium, Yangon nung China aser Chinese Taipei na AFC U-20 Women's Asian Cup Qualifier asayaba sülen China nung asayartem tangokba noksa nung angur. Iba asaya nung Chinese Taipei-i 1-0 agi koka liasü.

**BILEMDANGANG**  
"Ajak den yimjung nung alitsü merangang."